

# Cronicas davart l'istorgia e cultura da l'intschess retic (1)

■ **Tar cronicas sa tracta da raquints da novitads ed eveniments, descrits (per ordinari) en urden cronologic. A las materialias indispensablas da l'istorgia grischuna dal temp modern tempriv appartegna l'istoriografia da quell'epoca. Quella consista da scrittiras narrativas e didacticas ch'infurmeschan ils contemporans e la posteritad davart la genesa ed il caracter dal Grischun, davart impurtants eveniments dal temp sco era davart experientschas persunalas dals auturs.** La suandanta tipologia da las cronicas dal Grischun sa referescha a l'entira perioda dal 1500 fin il 1800. La produziun istoriografica da quell'epoca sa lascha divider, tenor intenziun e cuntegn, en trais geners: il gener umanistic-didactic, il gener cronical ed il gener memorialistic.

## Il gener umanistic-didactic

Quest gener da cronica collia la «topografia» (vul dir la descripciun dal pajais) cun l'istorgia politica. L'intenziun è instructiva, la descripciun extendida e represchentativa. Da gronda paisa è il referiment a la Rezia antica.

## Ovras

Franciscus Niger, predigtant e scolast a Clavenna, ha dechantà en s'ovra poetica latina «Rhetia sive de situ et moribus Rhetorum» (1547) il Grischun, sia populaziun e sia agricultura. Durich Chiampell, predigtant en l'Engiadina Bassa, ha publitgà en ils onns 1570 sia «Raetiae alpestris topographica descriptio» (descripciun dal pajais da la Rezia alpina) e sia «Historia Raetica». Sin quellas sa basa l'emprima descripciun pli vasta en lingua tudestga: la «Raetia» (1616) da l'um da stadi da Tavau Johannes Guler von Wyneck. La descripciun istorica tanscha fin viaden il 15avel tschientaner; en pli cuntegna ella ina geografia da las Terras subditas grischunas. Quai che manca qua, furnescha l'onni 1617 in auter um da Tavau, Fortunat Sprecher (von Bernegg), cun sia «Pallas Rhaetica armata et togata» (versiun tudestga cumpletta: «Rhetische Cronica», 1672). A quest model suonda la «Einfalte Delineation aller Gemeinden gemeiner dreyen Bünden», redigida il 1742 dal predigtant Nicolin Sererhard. Cun sias numerosas anecdotes e ses raquints narrativs po Sererhard dentant vegnir attribui per part al cronist memorialistic. In'ulteriura contribuziun originala è la «Beschreibung etlicher herrlicher und hochvernampter Personen in alter freyer Rhetia» (1598) da Hans Ardüser da Tavau che furma in lexicon istoricobiografic.

Florian Hitz

## Aegidius (Gilg) Tschudi

\* 5 da favrer 1505 a Glaruna, † 28 da favrer 1572 a Glaruna, catolic, da Glaruna. Figl da Ludwig sen. e da Margaretha nata Kilchmatt, numnada Aebli. ∞ 1) 1524 Anna nata Stucki, 2) 1550 Barbara nata Schorno, 3) 1568 Maria nata Wichser, vaiva Püntener. Scuola da latin a Glaruna, scolar da Huldrych Zwingli e da l'umanist Heinrich Glarean (a Basilea). A partir dal 1529 ha el occupà differents uffizis politics impurtants, ha represchentà repetidamain Glaruna a la Dieta confederala ed è stà in arbitradur dumanadà en conflicts confederali. En tut ses uffizis ha el represchentà ils interess dals lieus catolics. Sia preferenza unilateral per la Confederaziun catolica ch'era en la minoritad en il Glaruna, ha manà il 1560 a l'Affar da Glaruna (Glarnerhandel), in conflict da tempru religiosu (numnà era Guerra da Tschudi). A partir dal 1562 ha Tschudi vivi en l'exil a Rapperswil. Suenter ses return a Glaruna il 1565 è el sa deditgà a la represchentaziun da la preistorgia e da l'istorgia tempriva da la Confederaziun. El ha empruvà sco emprim da descriver istoricamain ils origins da la



Johannes Guler von Wyneck (1562-1637).

Confederaziun svizra. Da sias ovras è vegnida stampada durant sia vita mo «Die uralt warhafftig Alpisch Rhetia» (latin: «De prisca ac vera alpina Rhaetia cum caetero alpinarum gentium tractu descriptio»), omaduas versiuns en cumparidas a Basilea (1538), ina descripciun istoric-topografica dal Grischun e ses conturns ch'ha creà e dera-sà il mitus dals Rets. La lingua rumantscha era per Tschudi «erwildet und ergrobet» e qua tras ni degna ni abla da vegnir scritta. Il 1524 era Tschudi viaggià tras il Grischun ed aveva cumenzà a rediger quell'ovra a la fin dal decenni. La plipart da sias ulteriuras publicaziuns èn tradidas mo en furma da manuscrit. Si'ovra istorica principala, il «Chronicon Helveticum» (emprima ediziun 1734-36), cumpara sco ediziun scientifica dapi il 1968 ed è vegnida concluida il 2001. Tschudi è stà in confident da l'investg Thomas Planta ch'el ha – en num dals Confederads – defendì il 1551 a Roma cunter la denunziaziun. Il 1560 è el stà inquisitur en la dispita tranter la claustra da Mustér e la gliued da Quinto pervia da cunfins e l'utilisaziun dad alps sin il Pass dal Lucmagn. L'istoriografia grischuna tradiziunala ha prendi en mal il verdict en favur da Quinto ed era sias tentativas, interpretadas curt avant, d'incorporar Lantsch Sut al contadi confederal da Sargans. Sco politicher ed istoriograf è Tschudi anc adina ina «figura centrala per la perscrutaziun dal passà dal Grischun» (Sebastian Grüniger).

Adolf Collenberg

## Franciscus Niger

\* ca. 1500, † ca. 1563, da Bassano del Grappa (Venezia). Ses vair num talian era Francesco Negri. Pader benedictin da l'abazia da S. Giustina a Padua. Gia il 1524 ha Niger mussà simpatia per il lutheranism. Tranter il 1529 ed il

1531 è el stà activ sco tessunz a Strassburg, nua ch'el è entrà en contact cun divers reformatur. El ha maridà Cunegonda Regina Fessi. Il 1538 ha Niger translocà a Clavenna, nua ch'el ha manà ina scola privata ed instrui las linguas classicas. Sco simpatizant da las ideas anabaptistas ed antitrinitaras ha el participà il 1550 al Concil anabaptista a Vaniescha. El ha scrit e translà cudeschs da scola ed è stà autur d'in catechissem tenor Martin Luther e dal pamphlet «La tragedia del Libero arbitrio» che figurava en l'Index dal Vatican il 1559. Il 1547 è cumparida a Basilea sia «Rhetia sive de situ et moribus Rhetorum», in elogi umanistic, per part emfatic, da la libertad e da la toleranza religiosa en il Grischun. Enturn il 1561-63 ha el vivi a Pinczów sper Cracovia, nua ch'el ha frequentà il circol dals exilants antitrinitars talians.

Martin Bundi

## Durich Chiampell [Campell]

\* ca. 1510 a Susch, † ca. 1582 a Tschlin. Figl da Caspar (Chasper), guerrier ed aderent da la reformaziun. ∞ 1) Serena (nata Hug?), 2) NN (nata Bisaz?). Diversas variantas da num: Duri(s)ch Ch(i)ampell, tudestg Ulrich Campell. Studis nunconuscents, instruziun da latin tar Philipp Gallicius, predigtant e reformatur. Chiampell ha preggià en numerosas vischnancas grischunas, oravant tut en l'Engiadina, nua ch'el ha proclamà la cretta reformada. Il battaisem d'urgenza, accumulà a sia figlia tras il bab, ha manà a la Disputaziun da religiu a Susch (1537) ch'è stada impurtanta per la reformaziun en l'Engiadina. Chiampell ha cumbattì, ensem cun auters reformatur grischuns, las alianzas mercenarias ed è vegnì implitgà pliras giadas en conflicts politics. Intimà dal teolog turitgais Josias Simler, ha el redigi

suenter il 1570 per incumbensa da la Confederaziun la part grischuna da la descripciun dal pajais, publitgada pir en il 19avel tschientaner en ils dus toms «Raetiae alpestris topographica descriptio» (1573, tudestg 1851, rumantsch 1884) e «Historia Raetica» (tudestg 1851). Omaduas descripciuns manifesteschan in viv confess a la structura democratica da la Republica da las Trais Lias e surtut a la lingua e cultura rumantscha sco era ina tenuta defensiva visavi influenzas dal tudestg. Il 1562 è cumpari ses «Ûn cudesch da psalms» (576 p.) cun chanzuns spiritualas ed in catechissem – l'emprim text scrit en vallader. Daspera ha el translà dramas biblics ch'èn vegnids represchentads a Susch: «Giuditta e Holoferne» (1554), l'emprim gieu religios en vallader, e «Joseph, figl d'Israel» (1564). L'operusità da Chiampell en la baselgia da S. Regula a Cuira (1570-74) è stada da curta durada causa las circumstanzas politics e sias enconuschiensas manglusas dal tudestg. L'ultim decenni da sia vita ha Chiampell passentà a Tschlin en l'Engiadina Bassa, nua ch'el ha terminà sias ovras en latin.

Conradin Bonorand

## Johannes Guler (von Wyneck)

\* 31 d'october 1562 a Tavau, † 24 da schaner 1637 a Cuira, reformà, da Tavau. Figl da Hans e dad Anna nata Buol. ∞ 1) 1583 Barbla nata von Perini († 1588), 2) 1591 Elisabeth nata von Salis, figlia dad Andreas, vicari. Tras questa maridaglia è Guler vegnì il 1602 en possess dal pitschen chastè da Wynegg sur Malans, dal qual el ha fatg sia residenza e tenor il qual el sa numnava dapi alura. Il 1569 ha el accumulà per dus onns ses mez frar Peter, nominà vicari, en Vuclina. Scuola da latin a Cuira, alura studis a Turitg (1574), Geneva (1580) e Basilea (1582) ch'el n'ha betg pudì terminar, perquai ch'el è vegnì elegì il 1582 scrivant e pli tard era bandierel dal cumind da Tavau. Gia il 1587 è el daventà guvernatur da la Vuclina. Dal 1592-1604 è Guler stà landamma da Tavau e sco tal chau da la Lia da las Diesch Dretgiras. Engaschà repetidamain sco mess, tranter il 1600 ed il 1604, per exempel a nov missiuns diplomaticas en la Confederaziun, a Paris, Vaniescha e Milaun. El ha promovì energicamain in'allianza cun Vaniescha (chavalier da S. Marc 1603). Cumandant d'in regiment grischun incaricà da proteger il cunfin cun Milaun 1607; il medem onn è Guler vegnì condemnà a la mort tras ina dretgira nauscha a Cuira dominada da partisans spagnols. Suenter la rehabilitaziun tras ina dretgira favuraivla a Vaniescha (1607), è Guler sa retratg per diesch onns da la politica activa. Il 1618 è el danovamain vegnì nobilità al chavalier a chaschun d'ina missiun a la curt franzosa. Per mitschar dals Scumbigls grischuns, è Guler sa domicilià cun sia famiglia a Turitg ch'ha conferì ad el il dretg da burgais il 1619. Il 1620 ha el cumandà sco colonel las truppas grischunas ch'han empruvà duas giadas, senza success, da reconquistar las Terras subditas. Il 1622 ha el sustegnì la resistenza dal Partenz cunter l'Austria. Alura è Guler puspè sa deditgà a sias fatschentas privatas ed ha participà mo pli sporadicamain a missiuns diplomaticas. Il 1623 è el s'acquistà tras in barat il pitschen chastè da Susenberg sper Turitg. Il 1627 è el sa transferì en sia residenza da S. Margreta a Cuira. Il 1607 possedevea el otag chasas e 78 arments a Tavau sco era vignas en il Signuradi ed a Cuira.

Guler ha era gi gronds meritis sco istoricher e cartograf. Sia «Raetia», stampada il 1616 e deditgada a Louis XIII, è ina vasta cumpilaziun dad ovras da cronists grischuns e confederali. L'emprima part descriva l'istorgia grischuna, entant che la segunda, betg

terminada, cuntegna ina descripciun dal Grischun e da sias Terras subditas, accompagnada da tschintg tavlas geograficas. Il 1622 è cumparida sia «Pündnerischer Handlungen widerholte und vermehrte Deduction», in'ovra destinada en emprima lingua a giustifgar la Sullevaziun dal Partenz.

Silvio Färber

## Fortunat Sprecher (von Bernegg)

\* 9 da schaner 1585 a Tavau, † 14 da schaner 1647 a Cuira, reformà, da Tavau. Figl da Florian. Frar da Johann. ∞ 1) Elisabeth nata Sebrigonzi, figlia da Martin, da Berbenno, 2) Ludovica nata von Planta, figlia da Peter, chapitani en servetsch venezian. Instrucziun da latin tras scolasts privats, gimnasi a Cuira, studis a Basilea ed a l'Universitad d'Orléans, dr. iur. utr. 1606. Proveditur general e colonel en Vuclina 1612, cumissari a Clavenna 1617-19, 1623 (temp d'uffizi parzial) e 1625-27. Repetidamain mess da las Trais Lias, tranter auter l'avrigl 1621, ensem cun Gili Maissen e Fortunat von Juvalta, a Puntina ed a Damaist tar l'archiduca Leopold V d'Austria. Enconuscent è daventà Sprecher cun duas ovras d'istorgia cumparidas l'emprim en lingua latina, numnadamain la cronica retica «Pallas Rhaetica armata et togata» (1617, tudestg 1672 «Rhetische Cronica») e la «Historia motuum et bellorum [...]» (1629, ediziun tudestga 1702, intitulada «Historia von denen Unruhen und Kriegen [...]»), ina represchentaziun contemporana dals tumults e da las guerras dals Scumbigls grischuns cun ina charta dal Grischun da quel temp («Alpinae seu foederatae Rhaetiae [...]», 1618, ensem cun Philipp Clüwer). La Sentenzia da Waser dal 1644, ch'ha restrenschì la posiziun privilegiada da Tavau en la Lia da las Diesch Dretgiras, ha tutgà Sprecher talmain en ses sentiment da dretg ch'el ha chalà cun si'activitad da cronist. Chavalier da S. Marc.

Daniel Sprecher

## Nicolin Sererhard

\* 25 da schaner 1689 (Nikolaus) a Cuvlignas, † ca. 1755 a Sievgia, reformà, da Zernez. Figl da Rudolf, plevon, e da Maria nata Planta von Wildenberg. ∞ Anna nata Hatz, figlia da Peter, pur, da Cunter (Partenz). Scuola elementara a Ramosch e tar in reverenda a Brüsch 1706 e studi da teologia al Carolinum a Turitg 1707. Sco candidat a Tusaun, alura recepì en la Sinoda retica a Glion 1709. Plevon a Malix (1710) e Sievgia (1716-54). Sut l'influenza da Johann Jakob Scheuchzer ed intimà tras la collavuraziun al «Allgemeines Helvetisches, Eydenössisches oder Schweitzerisches Lexicon» da Johann Jacob Leu, ha Sererhard redigi il 1742 la «Einfalte Delineation aller Gemeinden gemeiner dreyen Bünden» (1872, reedi il 1994); versiun rumantscha parziala «Simpla delineaziun, o, Cronica dals cumüns da las Trais Lias» translà da Jachen Curdin Toutsch, 2005. Quest'ovra è ina funtauna impurtanta per l'etnografia e Sererhard sa mussa era sco bun raquintader. La part istorica percenter è pauc originala e sa basa oravant tut sin ils cronists Fortunat Sprecher von Bernegg e Johannes Guler von Wyneck.

Karin Marti-Weissenbach

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.